



Gabinete Wever - Croes II

ISLAONLINE

Noticia di Gobierno

2023

Diaranson 2 Augustus 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Evelyn Wever-Croes
PROME MINISTER

ARUBA TA MIRANDO UN CRECEMENTO ECONOMICO POSITIVO

E desaroyo positivo aki ta di gran beneficio pa e mercado laboral



Prome Minister Evelyn Wever-Croes a indica cu pais Aruba ta den pleno desaroyo. E estadisticanan pa loke ta trata turismo, ta muestra cu ya desde comienso di aña, a surpasa e nivelnan di prome cu pandemia, y cu den e ultimo lunanan, Aruba ta hayando mas tursita compara cu prome cu pandemia. Informacionnan positivo di ultimo dianan ta indica cu ya 3 linea crucero a compromete pa aumenta nan cantidad di 'calls' pa Aruba den 2024!

Lo mas principal ta, cu e turistanan cu ta bishitando ta gasta mas, lagando asina mas placa den e economia di pais Aruba. Esaki ta resultando den mas negoshi habriendo, creando mas cupo di trabou pa e tata y mamanan di famia, cu lo ricibi un salario digno pa asina por cubri nan gastonan y mantene nan famia. Prome Minister a splica cu e desaroyo positivo aki, ta hopi bon pa pais Aruba y di gran beneficio pa e mercado laboral.

Tambe desaroyo pa loke ta trata tarifa di importacion, manera ya Departamento di Impuesto y Minister di Finansa a indica, hunto cu e cobranza di BBO na frontera tin un simplificacion y cambio den tarifa di impuesto riba importacion (invoerrechten) di varios producto desde 1 di augustus. Ta trata aki di mas di 660 post cu ta conoce un cambio entre otro, cuminda y bebida, apartatonan cu ta genera energia berde, vehiculo y auto electrico, instrumento musical, buki, y material di construccion.



Un otro indicacion di desaroyo positivo na Aruba nos por mira den e rapport di IMF na unda cu nan a indica cu e crecemento economico di Aruba ta impresionante danki na e bon maneho di Gabinete Wever-Croes durante e pandemia. Mientras cu Banco Central a indica cu e crecemento economico ta mas di loke a premira. "Esaki ta yena nos cu orguyo pa e forma responsabel y determina cu Gobierno a maneha nos pais den tempo di crisis y awo den recuperacion", Prome Minister a expresa.

Premier Wever-Croes tambe a expresa di ta sumamente satisfecho cu e resultado positivo di graduacion pa cu e ultimo aña escolar. E porcentahe di graduadonan pa e aña escolar 2022 -2023, ta mas halto cu prome cu pandemia. Esaki kiermeen cu e hobennan cu mester a lucha cu nan estudio durante pandemia, a haci tur nan esfuerzo pa awe nan por a obtene nan diploma. E resultado aki sigur ta motibo pa ta hopi orguyoso di nos studiantenan, cu awor ta prepara pa sigui nan estudio den otro pais, of aki na Aruba mes.

"Aruba ta den pleno desaroyo, y ta importante pa sigui cu e desaroyo aki. Nos isla ta bendiciona, y ta conta cu un comunidad cu semper ta sostene y ta lucha hunto pa hiba e baranca aki dilanti. Nada ta pasa di su mes, e ta tuma esfuerzo y dedicacion pa yega na e metanan cu nos kier yega. Te ainda, nos no a yega na unda nos kier, pero hunto, cu fe den Dios, cu trabou duro y un actitud positivo, indudablemente nos lo logra", Prome Minister a expresa.



ROBERTO LOOPSTOK A CUMPLI 35 AÑA DEN SERVICIO DI GOBIERNO



Recientemente Minister di Cultura Xiomara Maduro a ricibi na Bestuurskantoor sr. Roberto Loopstok kende a cumpli 35 aña den servicio di Pais Aruba.

Roberto a cuminsa traha na Instituto di Cultura na 1981, na 1984 el a bay ter beschikking na Fundacion Museo Arubano. Dia 5 di augustus 1988 Roberto a bira Ambtenaar den vast pensioengerechtigde dienst. El a keda traha ter beschikking na Museo Historico/Fort Zoutman na unda ela traha 25 aña den Bon Bini Festival. Na 2004 Roberto a bin bek na Instituto di Cultura Aruba y desde 2007 Roberto ta Technische medewerker na Departamento di Cultura Aruba. Dia 5 di augustus 2023, Roberto ta haci 35 aña den servicio di Pais Aruba.

Den presencia di director di Departamento di Cultura Sr. Siegfried Dumfries y famia di Roberto, su yiu Rose-Mary y Rowald, tambe su nieta Silainy y nieto Cedrick, minister di Cultura a gradici Roberto pa su esfuerso y dedicacion di tur dia na bienestar di Pais Aruba y a entrega Roberto e respectivo decreto gubernamental y un recuerdo pa e ocasion special aki den su trayectoria di trabou.





EKIPO DI TOURISM ORIENTED POLICE A RICIBI CUATER BAIS NOBO PA ELEVA SIGURIDAD DEN CENTRO DI CIUDAD DI ORANJESTAD



Diaranson mainta, Minister di Husticia y Asuntonan Social sr. Rocco Tjon, tawata presente na Tribike Aruba, caminda a haci e entrega oficial di e cuater baisnan electrico nobo, pa e ekipo di e Tourism Oriented Police (TOP) di Cuerpo Policial. E aspecto bunita di e proyecto aki ta, cu esaki a wordo ehecuta a base di e peticion di e Agentenan Policial mes.

Manera ta conoci, algun luna atras nos a bishita tur e wardanan di Polis, caminda e Agentenan Policial mes por a trece padilanti nan preocupacionnan, necesidadnan y recursonan cu nan tin mester di dje pa por eherce nan trabou debidamente y asina brinda un miho servicio na nos comunidad. E baisnan ta un di e puntonan cu a wordo treci padilanti door di e propio Agentenan Policial, y manera semper a bin ta bisa, e presupuesto ta brinda suficiente espacio pa por adkiri materialnan cu Cuerpo Policial ta indica cu tin mester di dje.

E baisnan aki ta bay wordo uza door di e ekipo di TOP, pa eleva seguridad den centro di ciudad na Oranjestad, di e forma aki nos por wak cu turismo ta keda subi, mas barco crusero ta yega Aruba, hopi bishitante den e area di e centro di ciudad, pa cual motibo e baisnan aki ta sumamente importante.

Importante pa menciona cu e proyecto aki ta un extension di e proyecto di camara di seguridad, cual manera ta conoci a wordo aproba recientemente pa asina ekipa ful e centro di ciudad di Oranjestad cu camara pa eleva seguridad. Cu e adicion di e baisnan aki, e Agentenan Policial lo bay ta hopi mas mobil y mas presente den e centro di ciudad, garantizando asina e seguridad no solamente pa nos bishitantenan pero tambe pa comunidad y e comerciantenan den centro di Ciudad. Nos ta ta sumamente contento cu e entrega oficial di e baisnan a tuma luga cu henter ekipo di TOP.



MINISTER ROCCO TJON:

Ayera merdia, durante noticiero riba canal 88.9, a travez di e programa Enfoke, Patrick Paskel a menciona cu mi persona a wordo deteni door di Landsrecherche tempo cu mi tawata eherce mi funcion den Cuerpo Policial.

Ademas di esaki, Patrick Paskel a bisa cu esaki lo tawata tin di haber cu un caso caminda Polis lo a duna informacion clasifica y ricibi placa pa cu esaki, y cu mi persona lo a participa den e tipo di acto aki.

Por medio di e comunicado aki, mi ta desmenti rotundamente tur cos cu a wordo treci padilanti, durante e programa "Enfoke". Mi persona nunca a

wordo deteni of tawata involvi (ni como verdachte ni como getuige) den un caso di e indole aki. Mi persona no a participa na ningun caso unda un Agente Policial lo a paga un otro Agente Policial pa ricibi ningun tipo di informacion. Mi nunca tawata deteni na Landsrecherche, sigur no pasobra mi no tawata integro den mi funcion anterior.

Ta trata un biaha mas di un mentira indignante, pa es motibo, un keho penal lo ser entrega debidamente en contra di esaki. E tipo di engañosan aki ta atacha e imagen di mi credibilidad como persona y como minister di Husticia y Asuntonan Social, simplemente pa crea rabia den comunidad y pa bruha tera.



MINISTER ENDY CROES A ELABORA RIBA E AVANCENAN CU TA TUMANDO LUGA DEN DPS



Recientemente, Minister di Enseñansa y Deporte Endy Croes a indica cu un grupo grandi di alrededor 120 docente tabata yama pa informa cu nan pensioen no a wordo registra na APFA. E motibo pa cual e placa no tabata pasa di Departamento di Financia pa APFA ta paso e documentonan no ta na ordo, entre otro, e Ministeriële Beschikking (MB). Na luna di mei di e aña aki, Ministerio di Enseñansa a cuminsa traha riba e proyecto aki y ta premira cu pa fin di augustus di e aña aki e proyecto ta finalisa, unda cu tur 120 MB ta wordo firma pa Minister Endy Croes.

Fuera di esaki, Minister Endy Croes a trata e topico di Witte Vlek. Desde aña 2012, ora cu e sistema nobo NPR a bay na vigor tabatin hende cu no tabata paga prima of e aña ey no a

paga prima y nan a cay den un bashi. Ta trata di un grupo di alrededor 50 persona. E proyecto aki ta tuma un tiki mas tempo y tin mester di conseho di Departamento di Recurso Humano (DRH) pa wak con ta bay corigí esaki. E proyecto aki mester ta finalisa pa fin di aña 2023. DRH tin dos persona cu a cuminsa asisti DPS, pa asina duna nan contribucion profesional.

Banda di esaki, a acerca un compania externo pa traha un organogram nobo pa DPS. Lo presenta e organogram nobo den luna di augustus na DRH pa asina nan duna conseho. Unabes tin un consenso, ta presenta e organogram na Conseho di Ministerio pa aprobacion. Despues ta sigui cu e implementacion pa un direccion nobo. Den e lunanan nos dilanti ta duna mas informacion y detaye di esaki.

DI DOS GRUPO DI STUDIANTE A YEGA HULANDA



Despues cu e prome grupo di estudiante Arubiano a yega Hulanda diadomingo ultimo, a yega awe cu vuelo 769 di KLM e di dos y ultimo grupo di estudiante. Un total di 114 estudiante a yega y lo bai sigi un estudio avansa na nivel di HBO of Universidad na diferente ciudad di Hulanda.

Na Schiphol e studiantenan mescos cu tur aña a wordo saluda pa Minister Plenipotenciario mr. Ady Thijsen. Un delegacion consistiendo di functionarionan di Departamento di Enseñansa di Arubahuis, studiemmentor y miembronan di e POC (Plaatselijke Opvangcommissie) tabata para na diferente punto den sala di yegada di Schiphol pa encontra e studiantenan y guia nan unda nan mester para y forma un grupo pa warda nan turno pa bai na e bus cu lo hiba nan na nan ciudad unda nan ta bai studia.

Mester bisa cu e grupo di estudiante a sali basta liher cu nan maleta, mescos cu tabata e caso diadomingo. Asina e studiantenan cu mester bai na lugarnan leu, manera Leeuwarden, Groningen of Maastricht por yega basta tempran pa nan por bai sosega di e vuelo largo. Na Schiphol manera tur aña e conocido Robby Schouten tabata di e programa Leu foi Cas tabata presenra pa graba e yegada y haci algun entrevista cu e studiantenan. Otro persona cu tambe ta haci cobertura di e yegada di e grupo di studiantenan ta Roy Kelly di e website Arubiano.eu.

Awe tur studiantenan tin un dia di descanso na momento cu nan yega nan ciudad. Mayan lo cuminsa cu e programa di "opvang" obligatorio, cual lo dura entre tres dia y un siman. Durante e dianan aki e studiantenan nobo lo haya e guia nesesario den nan ciudad unda cu pa sigur cuater aña of mas nan lo biba y studia.

E prome aña e estudiante ta ricibi guia di un studiemmentor, pero pa e resto di su estudio e ta cai bou di Arubahuis pa sosten y guia.

Riba e Facebook pagina di Arubahuis y Onderwijszaken lo tin potretnan di e yegada di e grupo di studiantenan.





Desaroyo y progreso di un pais ta mas
sostinibel, fuerte y lihe ora cu cada
ciudadano di e pais uni den esfuersonan
y contribui cu positivismo na e vision
pa logra cosnan grandi pa futuro.

2023 AÑA DI UNION Y POSITIVISMO! _____